

Kalaallit Nunaanni pinerluttulerinermi inatsisip allanngortinneqarnera pillugu inatsisip (Killilikkamik piffissaligaasumik inissiisarfimmi inissiinermi piffissap sivilunerpaaffissaata qaffanneqarnera) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siumumiit siullermik aalajangiiffigisassatut siunnersuummut matumunnga qujarusuppugut, kingumut qinigaaftit siulii assigalugit pinerluttoqarsimatillugu pineqaatisseeriaatsit allannguiffiginiarnerannut tunngassuteqartoq. Siumumiillu imaattumik oqaaseqaateqassuugut.

Inatsisinik atuutsitsinermut oqartussaaffik ilisimasatsituut Naalagaaffiup ataani suli inissisimavoq, taamaattumillu suliassanut taakkununga tunngatillugu allannguinnissat imaluunniit nutaanik aalajangersagaliornissat danskit Oqartussaasuinut suliakkiutigineqartarput.

Kalaallit Nunaanni Eqqartuussisarnermi aammalu Pinerluttulerinermi Inatsisit nutaat 1. januar 2010 aallarnerfigalugu atuutilersinneqarput Eqqartuussiveqarneq Pillugu Ataatsimiititaliarpuq ukiorkaalluni suliaqareernerata kingunerisaanik. Pinerluttulerinermi inatsimmi unioqqutitsisoqarsimatillugu pineqaatissiisarneq eqqarsaatigalugu pinerluuteqarsimasup inuiaqatigiinni inissisimanera aammalu qanoq inuiaqatigiinni ajunnginnerpaamik akuulereqqinneqarnissaa qitiupput.

Nunatsinni pinerluttoqarsimatillugu pineqaatisseeriaatsit ullutsinnut suli naleqquttuunersut ukiuni makkunani inuiaat annertuutigit isummersorfigisarpaat – assinganik aamma Inatsisartuni sulinitinni. Pingaartumik sakkortuumik aammalu inunnut navianaatilinnik pinerlunnerit eqqarsaatigalugit

Siumumi pinerluutit sakkortuut, pingaartumik inoqatinut innarliinerit toqutsinerilluunniit akuerinngisaannarpagut akuersaanngisaannassallugillu. Taamatuttaaq isumaqarpugut ajornartorsiummut taama annertutigisumut akiuiniarluni sulinermut sakkut suulluunniit iluaqutaasinnaasut atorlugit ingerlasariaqartugut pisariaqarfiisigullu sukaterisariaqartugut, inuiaqatigiillu tamatta peqatigiilluta akiortuarneqarnissaannut akisussaaqatigiilluta kivitseqatigiittariaqartugut.

Siumumi soqutigivarput maanna pinerluttulerinermi inatsiseqarnerput eqqarsaatigalugu pineqaatisseeriaatsit naleqquttuunerat naleqquttuunnginneralluunniit paasisaqarfigissallugu – pisariaqarpallu sukateriffigissagigut. Soorlu aallarniissuteqarninni oqaatigigiga inuiaat akornanni oqallinnerit amerlasuutigit takutittarpaat pineqaatisseeriaatsit ullutsinni atuuttut sakkukippallaartut imaluunniit naapertuutinnigitsut. Taamatuttaaq Inatsisartuni sulinitinni suliassat pinerluttulerinermut aammalu eqqartuussisarnermut tunngasut assigiinngitsut eqqartortarnerini

partiinit oqariartuutit ersarissut tassaasarmata pineqaatisseeriaatsit nalilersorluarneqartariaqartut, ilaatigullu toqqaannartorujussuarmik pineqaatisseeriaatsit sukateriffigineqartariaqarnerat partiit ilaanniit kissaataasarluni.

Taamaammat Siumumi isumaqarpugut siunnersuut manna ataatsimiititaliami sukumiisumik suliarineqartariaqartoq, tassami pinerluttoqarsimatillugu pinerlineqartut innarlerneqarsimasullu inatsisitigut illersorneqarnerunerat aamma qitiusariaqarmat.

Nunatsinni pinerluutigineqartartut ilaatigut sakkortusiartortutut ipput, taamaammallu susassaqrarfiup iluani pitsaasumik, sukannersumik aammalu nunarsuarmioqataannitsinni ineriartoqataannitsinnilu pissutsinut naleqqussartuarluta ingerlanissarput Siumumiit pingaartikkatsigu matumani oqaatigissavarput, minnerunngitsumillu inuiaqatigiit ukiorpassuanngortuni kissaataat, tassalu sakkortuumik pinerluuteqarsimasut sivilisunerusumik parnaarusasarnissaannut kissaat Siumumiit isumaqatigalugu aaqqiissuteqaqataaffigerusukkatsigu.

Siumumiit taamatut oqaaseqarluta siunnersuutit ataatsimiititaliami nalilersorluarneqarnissaat aammalu suliarilluarneqarnissaat anguniarlugu Inatsisinut ataatsimiititaliami suliaannngortinneqarnissaat Siumumiit innersuussutigaarput.

Anders Olsen

Siumut